



Senin, 02 November 2020
Ogen: **Jeremia 36:1-10**



Suratken Ras Ogeken



Tuhan la erngadi-ngadi mpersingeti bangsaNa gelah jera dengen erlebuh mulihken man baNa. Situasi si jadi i sekelewet bangsa Juda ras Jerusalem e maba kebiaren man bangsa Israel. Kuta-kuta i sekelewet Juda enggo italuken Nebukadnezer ras lanai ndekahsa Israel pe nandangi ikepung ras italuken. Kerina bangsa Israel enggo lit i bas kebiaren si mesangat. Ieteh Tuhan kebiaren bangsa enda, emaka isuruhna nabi Jeremia nuratken kerina nubuat-nubuat si enggo pernah ibelaskenna tangtangna nari kin ia erdahin jadi nabi i tengah-tengah kalak Juda. Tuhu, nai nari la ibegiken bangsa Israel ia ngerana tapi sekali enda iulih ka nina Tuhan.

Emaka idilo Jeremia Barukh lako nuratken kerina nubuat-nubuat si enggo pernah ibelaskenna, sada sadai idiktekena man Barukh gelah isuratken i bas sada kertas. Tupung e kertas papyrus me ingan nuratken berita-berita si perlu isuratken. Kertas papyrus enda banci igulung ras murah mabasa. Bageme i bas piga-piga paksa dekahna Barukh nuratken kai si ikataken Jeremia. Kenca enggo dung, isuruh Jeremia Barukh lawes ku Rumah Pertoton lako ngegeken kerina si enggo isuratkena. Tupung e pas wari erpuasa i bas kalak Israel erkiteken kebiaren si mesangat sabap Nebukadnezer nandangi reh ngepung ras naluken bangsana. Emaka enterem kalak rehen ku Rumah Pertoton. Selain erpuasa enterem si ersura-sura megiken kata-kata pergegeh i bas nabi entah kalak si erdahin i bas Rumah Pertoton. La kepe bali sura-sura ras kai si iberitaken Barukh. Sabap si ipeseh Barukh eme berita ukumen adi la jera. Teridah i je maka Barukh mereken pilihnen, jera entah iukum, adi ipilihna ukumen, seh kal sangatna rawa Dibata man bana. Barukh la biar-biaren ngegeken kai si enggo isuratkena. Jadi pelajaran man banta gelah kita pe nuratken kai si enggo pernah si begi kerna Kata Dibata subuk i bas kebaktin-kebaktin entah pengalamen pribadinta erpaksa teneng guna iogeken man anak kempta gelah kinitkena pe reh paguhna, teridah arah kesetianna ngelakoken Kata Dibata.

Tupung Kata e isuratken, e jadi ingeten.

